


Gion Lechmann remplazza Duri Blumenthal

Ils gremis da la SRG.SSR Svizra Rumantscha per la perioda d'uffizi 2017–2020 èn puspè cumplets

DA MARTIN CABALZAR

■ **La radunanza generala da la SRG.SSR Svizra Rumantscha ha elegì sonda a Cuira ses gremis per il temp d'uffizi 2017–2020. Oscar Knapp da Scuol è vegni confermà sco president. La supranza sa cumpona da Beatrice Baselgia, Gion Cola, Donat Nay (fin ussa) e Gion Lechmann (nov). Nov president dal cussegl dal public è Roger Tuor.** Da las fatschentas statutaras èn las elecziuns stadas quest onn en il center. Ultra da la supranza èn era vegnids elegids las commembras ed ils commembers dal cussegl dal public e dal cussegl regional (guarda finestra!). Als commembers partents ha la radunanza generala engrazià per lur engaschament. In engraziament spezial per la lavur prestada ha il president *Oscar Knapp* drizzà a *Duri Blumenthal*, vicepresidente da la SRG.R, ed a *Michael E. Spescha*, president dal Cussegl dal public SRG.R. Omdas mettan a disposiziun lur posts suenter 12 onns pervia da limitaziun dal temp d'uffizi.



La supranza en nova cumposiziun. Da san. Gion Cola, Gion Lechmann, Donat Nay, Beatrice Baselgia ed Oscar Knapp.

FOTO RTR.

Las sfidas cuntinuan

En ses rapport annual ha il parsura Oscar Knapp menziunà che la sfida principala da l'onn 2015 sin plaun naziunal saja stada la votaziun davart il referendum cunter la lescha da radio e televisiun. Quella preveseva en emprima lingia ina midada dal sistem d'incasso per la consumaziun da cuntregns da radio, televisiun e multimedia. Che las regiuns rumantschas han acceptà la nova lescha fetschia ad el grond plaschair. Ina ulteriura sfida saja stada la decisiun dal tribunal federal areguard la taglia sin plivalur. Questa decisiun haja gi per consequenza che la SRG.SSR ha stui realisar in rigurus program da spargn.

La discussiun davart la contribuziun dal service public vegnia ad occupar la SRG.R e las ulteriuras societads purtadras er ils proxims onns. Pertutgadas da questa discussiun publica sajan cunzunt las purschidas dal program d'infurmaziun, sport, cultura e divertiment. Il service public saja d'eminenta impurtanza tant per la Rumantschia sco per la democrazia e la cohesiun naziunala da la Svizra, ha accentuà Knapp.

Egliada enavos ed enavant da la directura Ladina Heimgartner

En ses votum ha la directura *Ladina Heimgartner* accentuà la muntada dal service public da la SRG.SSR per la minoritad rumantscha. Mo grazia a questa solitad po RTR quintar annualmain cun in budget da 27,5 milliuns e porscher 130 posts da lavur per radund 170 persunas. Dentant saja era RTR sfurzà da spargnar radund 600 000 francs en il rom dal program da spargn da la SSR. Sco la directura ha accentuà ha RTR bain betg stui stritgar plazzas da lavur, scadina reducziun fetschia dentant mal e muntia ina reducziun da la purschida. Ella ha plinavant constatà cun satisfacziun che RTR gudogna vi e pli public sin las purschidas multimedias e sin ils chanals da medias socialas. Las fanestras d'emissions rumantschas a la Televisiun da la Svizra tudestga vegnan persequitadas da 30 000 fin 40 000 aspectatur. Er il portal dad online dad RTR vegnia consultà stediain cun radund 29 000 attags per di.

En il medem mument stoppia RTR dentant deplorablmain era registrar ina digren marcanta d'auditoras ed auditor e munta actualmain en la media a 9500 auditor per di. Era la media da vegliadetgna da l'auditori s'augmentia permanentmain e muntia actualmain a 56/57 onns. Quai muntia ina gronda sfida per tut las collavuraturas ed ils collavuratur. Ultra da quai ha la directura dad RTR er annunzià che RTR emettia durant la stad en la televisiun in magazin d'actualitad sut il titel «Sil punct». RTR correspunda uschia ad in givisch che vegn exprimì gia dapi onns regularmain dal public. Premiera per questa emissiun da test è glindesdi, ils 4 da fanadur a las 17.50 sin SRF1. Sin fundament da las experientschas vegn lura decidì sche «Sil punct» vegn realisà en l'avegnir sco element fix dal program dad RTR. Da nov è RTR era sin viadi cun in bus nostalgic tecnicain bain equipà en las valladas ed en ils vitgs rumantschs per sentir spontanain il puls dal publicum resp. da las consumentas e dals consuments, ha punctuà Heimgartner.

Tgi è la SRG.R?

La SRG.SSR Svizra Rumantscha è ina da las quatter societads purtadras da la SRG.SSR. Ella represchenta ils interess

da la populaziun rumantscha en il sector da radio, televisiun e multimedia. Cun sia unitad d'interpresa Radioteleviun Svizra Rumantscha (RTR) producscha ella ils programs rumantschs. Il cussegl dal public procura per in stretg contact tranter las persunas responsablas dal program ed il public. Il cussegl regional ha l'incumbensa da far enconuscent e francar la SRG.R en la populaziun rumantscha. Dals passa 1000 commembers da la SRG.R derivan 360 da la Surselva, 195 da l'Engiadina, 181 dal Grischun central, 179 da l'ulteriur Grischun ed 88 da l'ulteriura Svizra.

Premi SRG.R per Clà Riatsch

Il Premi SRG.R 2016 è vegni surdà a *Clà Riatsch*, professor per lingua e cultura rumantscha. Quai sco reconuschienscha per ses engaschi dapi blers onns per il mantegniment ed il svilup da la lingua rumantscha, ed en spezial era per sias activitads sin il champ da la litteratura rumantscha. La Quotidiana vegn a publicar proximain la laudaziun en extenso.

Il premi è dotà cun 8000 francs. *Esther Krättli* ha fatg la laudatio, la musica da *Domenic Janett* cun ses uffants *Anna Staschia* e *Gian Andri* ha dà il rom musical a la surdada dal premi.

Elecziuns dals gremis dad SRG.R

President SRG.R
Oscar Knapp, Scuol

Supranza SRG.R
Beatrice Baselgia, Domat
Gion Cola, Riom
Gion Lechmann, Falera
Donat Nay, Zignau

President cussegl dal public
Roger Tuor, Mustér

Cussegl dal public/
Selina Caduff, Laax
Pascal Gian Caminada, Cuira
Alexi Nay, Vella

Ursina Schmed, Trun
Gianna Sonder, Tinizong
Curdin Tuor, Trun
Adrian Viletta, Scuol

Cussegl regional
Andreas Cadonau, Vuorz
Vitus Dermont, Laax
Gian Peder Gregori, Panaduz
Barbara Riedhauser, Ziràn
Jan Sedlacek, Sent
Annaleta Semadeni-Kaiser, Andeer
Ruth Sonder, Salouf
Michael E. Spescha, Cuira/Cumbel
Patric Vincenz, Savognin
Linard Weidmann, Champfèr